

四庫全書

史部

欽定四庫全書

海塘錄卷十

內閣中書翟均廉撰

古蹟二

石湖 咸淳臨安志在仁和縣定山南鄉

臨平湖 咸淳臨安志輿地廣記云臨平湖在仁  
和縣祥符志云在縣東長樂鄉周迴十里湖中有  
白龍潭吳志赤烏二年寶鼎見因呼為鼎湖水經

注浙江又東合臨平湖是湖開天下平孫皓天璽  
元年吳郡上言臨平湖自漢末穢塞今更開通又  
于湖邊得石函函中有小石青白色長四寸廣二  
寸刻作皇帝字于是改天冊為天璽元年孫盛以  
為元皇中興之符徵五湖之石瑞也湖水上通浦  
陽下注浙江名曰東江行旅所從以出浙江也隋  
書地理志餘杭郡錢唐縣有臨平湖晉書五行志  
安帝元興二年臨平湖水赤仁和縣志臨平湖一

名鼎湖又名石函湖以在郡城東北與西湖對亦  
名東湖又名東江介于仁和海寧之間湖廣三十  
畝唐白居易嘗議蓄洩以溉田蓋唐宋以來湖水  
直至山下南宋遂為運道今久塞人家多占為桑  
田魚池而湖亦不通運道矣海寧縣志在縣西五  
十里去臨平鎮西南八里湖東西計八里一百步  
南北九里二百步深七尺遠映臯亭黃鶴諸峰與  
大海相界一名東湖梁龍德二年錢氏折錢塘鹽

官置錢江宋太平興國四年改錢江為仁和此湖  
半屬仁和矣後因潮決巖門汪埠浮沙壅塞小旱  
輒涸神州古史考鹽官海渡由臨平湖上通錢塘  
浙江直指同浦趨永興西陵秦漢以來江水故通  
自臨平湖塞遂不可考宋書孔覲傳云吳喜使劉  
亮由鹽官海渡直指同浦趨永興西陵諸軍潰散  
斬庾業等

詳見  
柳浦

按吳喜諸軍悉皆舟師漁浦黃山

浦柳浦同浦並在錢唐此鹽官海渡直指同浦趨

永興西陵即水經注臨平湖水上通浦陽是也

詩

權德輿臨平湖夜泛 素彩皓通津孤舟入清  
曠已愛隔簾看還宜捲簾望隔簾當此時惆悵  
思君君不知

張祐過臨平湖 三月平湖草欲齊綠楊分映  
入長隄田家起處烏鴉吠酒客醒時謝豹啼山  
檻正當蓮葉渚水堦新築稻秧畦人間謾說多

岐路咫尺神仙路欲迷

皇甫冉臨平道贈同舟人  
遠山誰辨江南北  
長路空隨樹淺深  
流蕩飄飄此何極  
唯應行客共知心

顧況臨平湖  
采藕平湖上  
藕泥封藕節  
船影入荷香  
莫嫌蓮柄折

楊萬里泊舟臨平  
前窻向市下却簾後窻臨  
水開却門岸頭楊柳報春動  
溪底雲天隨浪翻

隔溪數間黃草屋繞屋千竿翠瓊竹三老鳴鉦  
艤拖樓今宵又向臨平宿

楊萬里過臨平蓮蕩四首 蓮蕩層層鏡樣方

春來嫩玉斬新黃角頭一一張蘆箔不遣魚蝦

過別塘 蓮蕩中央劣露沙上頭更着野人家

籬邊隨處插垂柳簷下小船繫釣車 朝來採

蓮夕來漁水種菱荷岸種蘆寒浪落時分作蕩

新流漲後合成湖 人家星散水中央十里芹



羹菰飯香想得薰風端午後荷花世界柳絲鄉  
蘇軾雪後至臨平與柳子玉同至僧舍見陳尉  
列落帆古戍下積雪高如丘強邀詩老出疎  
髯散颼颼僧房有宿火手足漸和柔靜士素寡  
言相對自忘憂銅爐擢烟穗石鼎浮霜漚我行  
雖有程坐穩且復留大哉天地間此生得浮遊  
蘇軾舟過臨平次韻 餘杭門外葉飛秋尚記  
居人挽去舟一別臨平山下路五年雲夢澤南

州淒涼楚地緣吾發邂逅秦淮為子留寄謝西  
湖舊風月故應詩許夢中遊

釋道潛經臨平作

風蒲獵獵弄輕柔欲立蜻

蛭不自由五月臨平山下路藕花無數滿汀洲  
薩都拉過臨平 昔人五月臨平路汀洲藕花  
滿無數比來三月過臨平雪白楊花捲波去楊  
花捲盡藕花開令人古人俱到來欲向山陰尋  
賀老酒船到處且徘徊

高齋過臨平 征帆一似白鷗輕起揭船篷看

曉晴梅子著花雪壓岸自披風帽過臨平

張昱臨平湖 船過臨平欲住難藕花紅白水

雲間只應一霎溟濛雨不得分明看好山

龍溪 在橋司東土備塘北俗名天開河即古臨  
平湖也

月湖 成化杭州府志在海寧縣西南四十五里  
赭山西側周一百八十大深五大海寧縣志其形

如月故名今為海沙壅塞

宋長安堰 咸淳臨安志在鹽官縣西北二十五里即舊義亭埭海寧縣志一名長安見陸放翁入蜀記今在長安鎮

詩

葉紹翁發長安堰 秋老蟲聲切晨興草氣香  
買瓜依綠樹出水得青秧船聚知村近牛閒覺  
晝長雙鳬蓮葉蕩無雨故生涼

長安新堰

即長安壩

成化杭州府志在長安鎮乃南

北要衝之地舊有堰車上下船官使不便而商舟多留者元至正七年松江韓日升李克復捐已財買地置堰而於舊堰之西為壩車船州判官呂呼都喇爾董役有成堰旁居民周姓者亦以附近田三畝拓之由是堰益增廣至今兩為民便陳善海塘考寧邑地形最高俗因指吳江塔巔與長安壩址相並有如海寧一決注之列郡如建瓚然

詩

謝肅過長安壩 海寧縣西來徃頻長安壩上  
獨尋春東風桃李非無主歸燕樓臺不見人天  
末去帆隨望遠雨餘芳草喚愁新故鄉門巷雲  
山外越客相逢話是真

長安三閘 海寧縣志在長安鎮自抗而東水勢  
走下稍旱則涸故置閘以節宣焉宋紹聖間提刑  
鮑累杪擢木築之重設陡門二後毀于兵運使吳

請易以石紹熙二年提舉張重修自下閘九十步  
至中閘又八十步至上閘舊有兩澳環築以隄上  
澳九十三畝下澳一百三十二畝水多則蓄于兩  
澳旱則瀉注于閘元閘廢兩澳為民所侵至正十  
年知州張光祖修三閘以柏木為之上置銳環旱  
則閉潦則開

朱橋 咸淳臨安志在范村萬厯錢塘縣志上諸  
橋一曰大朱橋萬厯二十四年釋祿宏修造江月

松風集在定山北江船抵暮或避風俱泊橋下

詩

錢惟善朱梁夜泊 長虹下飲逆流渾雪色沙  
寒石鬪喧晚飯鐘催隣驛寺宵漁燈映並山邨  
月明欲解江雲語風急難招賈客魂忽憶楓橋  
曾繫纜一篷烟雨夢吳門

高橋 海寧縣志在黃灣市

詩



楊璿高橋 突兀橫前浦排風野墅舳舻夕陽虹  
影動躡落海門潮

望海樓 杭州圖經東樓一名望海樓在舊治中  
和堂北太平寰宇記樓高十八丈唐武德七年置  
乾道臨安志今廢咸淳臨安志東樓一名望潮樓  
詩

白居易重題別東樓 東樓勝事我偏知氣象  
多隨昏旦移湖卷衣裳白重叠山張屏障綠參

差海仙樓塔晴方出江女笙簫夜始吹春雨星

攢尋蟹火秋風霞颭弄濤旗

餘杭每歲八月迎濤弄水者悉樹旗

幟

宴宜雲髻新梳後曲愛霓裳未拍時太守三

年嘲不盡郡齋空作百篇詩

元稹和樂天重題別東樓 山容水態使君知

樓上從容萬狀移日映文章霞細麗風吹鱗甲

浪參差鼓催潮戶凌晨擊笛賽婆官徹夜吹喚

客潛揮遠紅袖賣爐高挂小青旗賸鋪牀席春

眠處乍捲簾幃月上時光景無因將得去為郎  
抄在和郎詩

蘇軾望海樓五絕 海上濤頭一線來樓前指  
顧雪成堆從令潮上君湏上更看銀山二十回  
橫風吹雨入樓斜壯觀應湏好句誇雨過潮  
平江海碧電光時掣紫金蛇 青山斷處塔層  
層隔岸人家喚欲應江上秋風晚來急為傳鐘  
鼓到西興 樓下誰家燒夜香玉笙哀怨弄初

涼臨風有客吟秋扇拜月無人見晚妝 沙河  
燈火照山紅歌鼓喧呼笑語中為問少年心在  
否角巾歌側髻如蓬

蘇軾八月十七復登望海樓自和前篇是日勝

出與試官兩

一作五

人復留五首

樓上烟雲怪

不來樓前飛紙落成堆非關文字須重看卻被

江山未放回

眼昏燭暗細行斜考閱精強外

已誇明日失杯君莫笑早知安足不成蛇 亂

山遮曉擁千層睡美初涼撼不謦昨夜酒行君  
屢歎定知歸夢到吳興 天台桂子為誰香倦  
聽空階夜點涼賴有明朝看潮在萬人空巷鬪  
新妝 秋花不見眼花紅身在孤舟兀兀中細  
雨作寒知有意未教金菊出蒿蓬

蘇轍次韻子瞻登望海樓五絕 山色潮聲四  
面來城中金碧盡成堆不嫌門外嚴扃鎖終日  
憑欄未擬回 湖色蒼蒼日向斜烟波萬狀不

容誇畫船人去浮紅葉石徑僧歸躡白蛇樓  
觀爭高不計層噤噤過鴈自相鷹錢王舊業依  
稀在歲久無人話廢興荷葉初乾稻穗香驚  
雷急雨送微涼晚晴稍放秋山色洗却濃妝作  
淡妝白酒傾漿膾斫紅晝遊未厭月明中樓  
高只辨聽歌吹不見遊人轉似蓬

楊維禎與客登望海樓作錄寄玉山主人 蚤  
子雨開江上臺江頭野老不勝哀屢將樓閣空

中落鱗引旌旗月下來保障許誰為尹鐸事諧  
無復問天開可憐歌舞舊城闕又是昆明幾劫  
灰 嫋嫋秋風起洞庭銀州宮闕渺空青客星  
石落江龍動神馬潮來海雨腥弱水無時通漢  
使赭峯何事受秦刑遠人新到三韓國中土文  
明聚五星

疊雪樓 成化杭州府志武肅王於疊雪樓架强  
弩數百以射潮蘇詩自註吳越王嘗以弓弩射潮

頭與海神戰自爾水不近城

映江樓 西湖遊覽志宋時有亭扁曰烟雲魚鳥  
元至正庚寅重建扁曰瞰江正德元年改建層樓  
扁曰映江尚書屠浦為記

詩

趙與滂登浙江樓 兩岸共明月闌干霄漢間  
風波浙江水砥柱海門山晝夜潮消長利名人  
往還不知沙上鷺玉立一身閒



李贊登映江樓 形勝東南屬此樓  
微垣公暇喜重遊  
座中山色浮江表  
午後潮聲自海頭  
滕閣雅宜王勃記  
岳陽誰並仲淹憂  
清時未許耽行樂  
兩浙蒼生望澤流

吳國倫八月十八日映江樓望潮 映江樓望  
浙江潮八月長風海若驕  
萬馬蹴蹄驚地軸  
千鯨噴沫撼星杓  
天連巨浸疑相盪  
雷捲重山忽自消  
却怪賈帆空際落  
翩如六翮下扶搖

吳一鵬映江樓 大江相映有層樓  
秋爽登樓是勝遊  
烟水直應通海口  
雪山那復見潮頭  
六橋自覓蘇公迹  
兩地誰忘范老憂  
留得玉堂揮翰手  
品題聊藉舊風流

百尺樓 咸淳臨安志  
越王起百尺樓以望海  
因名其浦曰百尺浦  
今廢

詩

趙抃次韻即事見懷

鑑水寬閒稱越國  
河塘

繁劇是杭州蓬山君繼元丞相竹馬予慚郭細  
侯郡邑豐穰真可喜人家飽煖更何憂西陵隔  
岸無多遠數上臨江百尺樓

葛惠保過百尺樓遺址 百尺浦遙樓百尺當  
年霸業何赫赫海色空濛望不窮晴輝一片烟  
濤白吳山越水自春秋無限風光日夜浮高樓  
遺跡空荒草惟有沙禽送急流

沈廣煇百尺樓懷古二首 縹緲層樓湧碧空

欄杆小倚暮烟中  
霸圖曾記千秋永  
藩鎮空傳一代雄  
海近銀濤衝繡戶  
山低璧月上雕櫳  
卽令雨露春來好  
濃艷林花分外紅  
朱闌碧檻昔登遊  
萬頃鯨波一望收  
鮫室霧昏吞嶼沒  
海門潮激蹴天浮  
孤軍誰枕金戈卧  
古戍猶吹畫角愁  
回首雄圖成往事  
夕陽鴉陣下危樓

范驤百尺樓  
江籬半綠越王浦  
夜月初生伍相潮  
借得鄰翁半畝地  
好驅黃犢種春苗

海山一覽樓 硤川志在審山觀海峯絕頂海寧  
縣志宋安化郡王王沆建今廢沆號慕京邑人呼  
其樓曰慕京嘗延辛次膺劉光祖訓子于此

詩

朱尚海山一覽樓 風翻巨浪千尋碧雨沐羣  
峯萬仞秋凍氣逼人來枕簟晴雲飛影傍簷鉤  
看山樓 海寧縣志在黃灣徐一夔看山樓記黃  
灣地瀕海外障波濤而內固聚落者皆山也馬氏

日綱者以績學為事有樓曰看山日藏修其中

望海亭 西湖遊覽志中峯畔有望海亭今廢

詩

元稹酬鄭從事四年九月宴望海亭次用舊韻

海亭樹木何龍蔥寒光透坼秋玲瓏湖山四

面爭氣色曠望不與人間同一拳壤伏東武小

兩山鬬構秦望雄嵌空古墓失文種突兀怪石

疑防風舟船駢比有伴侶水雲滄泱無始終雪

花布遍稻隴白日脚挿入秋波紅興餘望劇酒  
四坐歌聲舞艷烟霞中酒酣從事歌送我歌云  
此樂難再逢良時年少猶健羨使君況是頭白  
翁我聞此曲深歎息唧唧不異秋草蟲憶年十  
五學構厦有意蓋覆天下窮安知四十虛富貴  
朱紫束縛心志空梳妝伎女上樓榭止欲歡樂  
微茫躬雖無趣尚慕賢聖幸有心目知西東欲  
將滑甘柔藏府已被鬱噎衝喉嚨君今勸我酒

太醉醉語不復能冲融勸君莫學虛富貴不是  
賢人難變通

元稹酬周從事望海亭見寄 年老無流輩行  
稀足薜蘿熱時憐水近高處見山多衣袖長堪  
舞喉嚨轉解歌不辭狂復醉人世有風波

王炎二月中休日黃帥領客登望海亭次韻

輦飛棟宇壓危峰面面風光入座中潮汐近迎  
天闕下蓬瀛疑在海門東巡行誰說秦皇事疏



鑿令餘夏后功空闊無邊惟此地君侯心與境  
相同

安濟亭 乾道臨安志祥符舊經云在錢塘舊治  
南到縣二十里烏臺詩話軾任杭通判因八月十  
五日觀潮作詩五首寫在安濟亭上第四首言弄  
潮之人貪官中利物致其間有溺而死者故朝旨  
禁斷

詩

蘇舜欽宿錢唐安濟亭觀濤 支肘聽潮聲喧

歷久未停隨風過漁浦伴月出滄溟  
鱗穴復時滿胥神果有靈連天卷雲霧  
徹曉下雷霆拾楫游心倦憑欄醉魄醒  
語窮造化意擬訪酈元經秀江亭 武林  
梵志在月輪峯傍咸淳臨安志開化寺  
有秀江亭

詩

樓鑰次韻六和塔秀江亭間壁留題 江  
外參

差列萬山我家深在萬山間好山正不用錢買  
但要未老身先閒長江比愁終似少江水能回  
愁不了扁舟何日過西陵鄮山佳處吾歸老

李宗勉題秀江亭 經行塔下幾清秋每歎無

緣到上頭今日登臨方覺險不如歸去卧林邱

毛萬齡登秀江亭望海 層樓落日海門開千

里濤聲一瞬來我欲憑欄看起處晴江白雪滿

瑤臺

御香亭 宋在龍山下田瑜築龍山隄自御香亭  
下創為二百丈見丁寶臣石隄記

聽潮軒 海寧縣志不詳其處

詩

張寧聽潮軒 海門蕩蕩天風來狂瀾倒海如  
山摧空雷隱地雨將作萬鼓齊伐車喧阗初疑  
羣蠅爭振翼忽著洪爐沃湯液風迴籟轉覺漸  
遠兵馬蕭蕭走勅敵年去年來自有期春秋長

落幾人思天涯共道初來懼夢裏空驚夜語時  
海瀕老禪得幽趣禪居正近潮來處山荒落木  
境無人地迴天高歲月暮諸塵斷絕雙耳清天  
機自動非人聲上方鐘梵隨風散下界樓臺孤  
月明

納雲軒 海寧縣志在西郭接待寺後成化杭州  
府志接待朱何庵在縣西一里元延祐間中峯和  
尚開山內有納雲軒大理丞朱逢吉監修海塘有

題納雲軒詩

詩

朱逢吉題納雲軒 怕著纖塵點翠坳獨留雲  
住結神交飛騰不逐蒼龍化伴宿清于老鶴巢  
曉和篆烟生象藏夜籠窻月掛梅梢年年藏得  
春如海還望為霖澤四郊

樟亭驛 乾道臨安志樟亭驛晏殊輿地志云在  
錢塘縣舊治之南五里浙江亭祥符舊經云在錢

塘舊治南到縣一十五里咸淳臨安志樟亭驛今  
為浙江亭夢梁錄樟亭驛即浙江亭也在跨浦橋  
南江岸凡宰執辭免名出居此驛待報神州古史  
考古樟林桁也唐曰樟亭驛異苑曰晉時錢塘  
浙江有樟林桁大船每有來者輒漂盪搖揚而不  
可禁嘗鳴鼓錢塘江頭凌浪如故惟船吏章粵能  
相制伏及粵死遂廢去按樟林桁者若江南朱雀  
航古時未嘗築塘所謂錢塘者別在西竟龍山而

下江名柳浦舶航以渡航桁通稱以樟木得名矣  
晉稱樟林之桁造舟為梁唐號樟亭之驛長隄築  
土自隋郡建于柳浦唐城築自江塘郊海門而池  
浙江下鐵幢以射潮水美子烈之旨迹嘆彭城之  
神功乃知豫章比郡豈曰常材松陽之門並傳千  
載故至今以樟亭名驛

詩

孟浩然與錢塘令登樟亭驛 百里鳴雷震聞



絃暫輟彈府中聯騎出江上待潮觀照日秋空  
迥浮天渤海寬驚濤來似雪一座凜生寒

孟浩然與杭州薛司戶登樟亭作 水樓一登

眺半出青林高帝幕英僚散芳筵下客叨山藏  
伯禹穴城壓伍胥濤今日觀溟漲垂綸欲釣鼇  
白居易樟亭雙櫻樹 南館西軒兩樹櫻春條  
長足夏成陰素花朱實今雖盡碧葉風來別有

情

白居易宿樟亭驛 夜半樟亭驛愁人起望鄉  
月明何處見潮水自茫茫

張祐題樟亭驛 曉霽憑虛檻雲山四望通地  
盤江岸絕天映海門空樹色連秋靄潮聲入夜  
風年年此光景催盡白頭翁

李郢秦處士移家富春發樟亭驛寄懷 潮落  
空江洲渚生知君已上富春亭嘗聞郭邑山多  
秀更說官僚眼盡青離別幾宵魂耿耿相思一

夜髮星星仙翁白石高歌調無復松齋半夜聽  
鄭谷題樟亭驛樓 故國江山外登臨返照間  
潮來無別浦木落見他山沙鳥晴飛遠漁人夜  
唱閒歲窮歸未得心逐片帆還

許渾九日登樟亭驛樓 鱸膾與莼羹西風片  
席輕潮回孤島晚雲斂衆山晴丹羽下高閣黃  
花垂古城因秋倍多感鄉樹接咸京

項斯杭州江亭留題 處處日馳銷憑軒夕似

朝漁翁閒鼓櫓沙鳥戲迎潮樹間津亭密城連  
塢寺遙因誰報隱者向此得耕樵

章孝標題杭州樟亭驛 樟亭驛上題詩客一

半尋為山下塵世事日隨流水去紅花還似白  
頭人

喻坦之題樟亭驛樓 危檻倚山城風帆檻外行  
日生滄海赤潮落浙江清秋晚遙峯出沙乾細  
草平西陵烟樹色長見伍員情

曹既明夜宿浙江亭 夜半潮聲撼客艘卧聽

柔櫓開空江驚回倦枕鄉關夢海日烘山上曉

窻

汪元量浙江亭別客 諸公來此欲憑欄禿樹

沾雲濕不乾小燕正嫌三月雨老鷺又受一春

寒樓頭呼酒盡情飲江上遇花隨意看莫怨人

生有離別人生到此別離難

樊時中觀潮題樟亭 烟波閃閃海門開平地

潛生萬壑雷大信不虧天不老浙江亭上看潮  
來

邵思文題浙江亭 極目錢塘上千山列畫屏  
雨晴紅樹碧潮落海門青對景悲王導移家憶  
管寧臨風一惆悵沽酒慰飄零

馬三才同林對山宿浙江亭 江亭細雨夜窗  
幽一榻青燈話未休撫枕不勝千里思感懷又  
遇萬山秋乾坤異地憐青眼湖海同心愧白頭

莫惜相逢今日醉他年吾輩是南樓

范村市 成化杭州府志濱浙江多停木植近年客商物貨往西溪者多于此居停漸成巨鎮神州古史考在府城西南三十里范村市濱江往西溪者由此唐時稱為范浦崔國輔宿范浦詩路轉定山繞塘橫范浦連是也地近泉亭總會稽之西部塘橫范浦歷漁潭之東津徘徊定已諸山咫尺柳同二浦猶之錢唐轅絡古漢史述其封侯又如錢

唐杜子恭齊書稱其拜墓全琮之族著績東安褚  
淵之門徙居陽翟此則御龍之家世祿于范氏者  
也按錢唐郡三姓全范褚晉書范平子安南史范  
叔孫又范之琰字伯珪梁書范述曾字子云皆錢  
唐人

詩

樓鑰訪留服文於范村山間不得見 黃扉處  
士掩松關小立松風去住難可歎山中真宰相



未容神武掛衣冠

張丹由范村出江口

嶺窮緣谷轉厓斷傍江

開亂石都成陣歸潮不作雷履沙聲似雨見鳥  
色如梅已訝無人境還看有路隈

湯村鎮

乾道臨安志本仁和鎮端拱元年改隸

仁和縣杭州圖經仁和縣湯村鎮市在安仁東鄉  
去縣四十一里而都鹽倉在天宗門裏咸淳臨安  
志有湯鎮庫

詩

陳起適安招遊湯鎮不果赴 湯鎮古祠宮招  
邀及倦翁輕裘乘曉月駿馬逐東風野色觀無  
分春光病見攻行將迎誕日一辦總遙通

臣謹按宋仁和縣界水路東南沿湯村塘至  
緒中石橋抵鹽官縣七十里據此可知宋湯  
村係沿海塘者

隋唐城基 神州古史考自龍山閘至柳浦之東

脩廣七八里所稱江塘者皆隋唐時城基也蓋此地沿江而城昔時臨江登陴故李華云雲濤歎激于城下是其實錄城東南隅為南亭子即杜牧之所記自錢氏立鐵幢之浦築捍海之塘乃達候潮通江二門而杭州之城日以斥大于是沿江而東皆為江塘其上金城萬堞今牆已壞堞雉僅存雖圯為民居而龍鳳為城江河為池山川城郭瞭若指掌矣

宋修江司 咸淳臨安志護聖步軍七寨一在修  
江司側乾道臨安志捍江五指揮每額營四百人  
修江指揮管一百二十人橫江水軍指揮額管二  
十四人錢唐遺事錢王射潮作亭路上鑄鐵箭埋  
之以示鎮壓之意然潮汐之來常失故道臨安府  
置一司名修江司馬

宋將臺 江月松風集在定山北每歲春秋萬夫  
分兩翼帥士卒習水戰于此

詩

錢惟善浙江耀武 年年江上習舟師故事相  
傳劫火池春日樓船觀晉將秋風弓弩學吳兒  
素車白馬迎旗隼紫鳳天吳畏虎貌日暮元戎  
歸細柳散花洲畔凱歌時

海神壇 咸淳臨安志在東青門外太平橋之東  
淳祐十二年有旨中興以來依海建都宜以海神  
為大祀下太常議禮詔守臣馬光祖建祭殿望祭

自寶祐之元歲以春秋二仲遣官行事

月塘寺 成化杭州府志舊在月塘之北宋淳熙五年建賜真如院額嘉熙三年潮壞淳祐五年重建於何衛店元至正初潮水復壞遷建高原元末燬明洪武間復建

水陸寺 咸淳臨安志在太平橋北前沙河前淳熙九年重建東坡督開湯鎮運河宿此有詩寄北山清順成化杭州府志舊在城東湯鎮路上宋建

隆二年建元祐間賜令額紹興十二年燬乾道二年重建嘉熙三年潮壞遷建鹽官縣昌亭鄉許村陸蓮菴基寶祐二年又移于華家池北元末燬明洪武年間復建

詩

蘇軾是日宿水陸寺寄北山清順僧二首 草沒河隄雨暗村寺藏脩竹不知門拾薪煮藥憐僧病掃地焚香淨客魂農事未休侵小雪佛燈初

上報黃昏年來漸識幽居味思與高人對榻論  
長嫌鐘鼓聒湖山此境蕭條却自然乞食遶  
村真為飽無言對客本非禪披榛覓路衝泥入  
洗足關門聽雨眠遙想後身窮賈島夜寒應聳  
作詩肩

蘇轍次韻子瞻雨中督役夜宿水陸寺二首

雲氣連山雨瀉盆暮投僧舍欲關門暫時灑掃  
寬行役終夕崎嶇入夢魂煩熱暗消秋簾冷爇



濡未解夜燈昏二年遊宦多勞苦何日相從得  
細論野寺蕭條厭客喧兩坡脩竹亂紛然已  
因無食聊從仕深悟勞生不問禪未至莫憂明  
日事偷閒且就此宵眠天明歸去芒鞋滑雖有  
藤輿懶上肩

雪峯廣福院 成化杭州府志在縣東北七里唐  
大中間雪峯存禪師來叅鹽官齊安禪師因結廬  
於東南五里人見夜光亘天居民爭施建光明禪

院宋熙寧元年賜名壽聖紹興三十三年改賜東  
庵廣福禪院雪峯手鑿一井大旱不竭井中時聞  
風濤之聲泰定二年潮壞今處改名雪峯廣福院  
元末兵燬重建併真相寺元張光弼撰記海寧縣  
志郡太守邑令延慶善惟尚禪師主席殿宇堂廡  
一新泰定間潮冲徙今處改額雪峯廣福院後併  
真相寺明末安國寺僧會紹宗重葺

詩

施德操廣福禪院 何處登臨眼最明雪峰佳

處一川平潮從海月生時上峯在雲天盡處橫  
幢蓋神扶喬木影風雷井閉古泉聲雲蹤鑿盡  
翻惆悵何日名山報道成

許應龍游雪峯 十年不到雪峯山寂寂春風  
晝掩關千載祖師無盡意門前流水綠回環

慶善寺 咸淳臨安志在縣西南二百步天監七  
年士人宏靈度因井中有光三日不止舍宅為寺

地濱海遂以觀海為名會昌五年廢成化杭州府  
志宏靈度井中淘獲銅僧伽像唐大中間門外建  
石經幢塔以鎮海濤宋大中祥符元年賜令額外  
有潮神廣福廟元末回祿令併延恩寺

王兢題圓照堂 佛心開晦冥覺性極融明實

相自然見客塵何處生銅瓶秋水淨草坐月華  
清不必曹溪去穿雲振錫行

海塘錄卷十

欽定四庫全書

史部

海塘錄卷十二

詳校官監察御史

臣王爾烈

刑部郎中

臣許兆椿覆勘

總校官進士

臣朱

鈐

校對官編修

臣盧

遂

謄錄監生

臣郭文

銑

欽定四庫全書

海塘錄卷十一

內閣中書翟均廉撰

祠祀一

勅建潮神廟 在海寧小尖山之麓浙江通志康熙五十九年巡撫朱軾題請於海寧縣小尖山建立潮神廟海塘通志六十一年

勅封運德海潮之神春秋祭祀

欽頒協順靈川

御扁恭懸廟中其旁為舊時石墩司基地西湖志纂乾隆

二十七年春

皇上閱視海塘至廟中

御書殿額曰恬波孚信

御題殿柱曰池通潮汐安江裔川障東南護海門

詩

查慎行海寧海隄告成制府滿鳧山疏請立



海神廟度地于小尖山麓

皇上御書協順靈川四字賜之扁額用示褒崇壬寅仲冬藩臬二長祇承臺檄莅止廟中虔恭將事慎行老病里居獲逢盛典敬賦俚言以志不朽云路轉山迴水接天高甍巨棟鎮山前神封不以公侯重

睿藻長如日月懸雲散蜃樓呈象出波平龍窟抱珠眠堯民同此安耕鑿來與

君王祝萬年

查慎行乙巳重九日同人於小尖山潮神廟登高二首  
海闊天低處登臨不在高一年秋尚晚二老興仍豪  
練練沙紋細層層石脚牢西風吹帽落絕勝上金鰲  
積雨當新霽亭空望不迷雲烟無朕迹天地露端倪  
水勢方趨下潮頭急轉西近帆看漸遠一點鳬鷺

查嗣琛九日同兄初白登高尖山潮神廟分賦

三首 不信經秋雨能開九日晴杖藜隨漫興  
詩思入秋聲落檻諸峯小鋪窗鏡面平蜃樓吾  
不見身已踏蓬瀛 康熙後辛丑鑿石始開亭  
地自元臣闢山因

睿藻靈功應同砥柱名可列圖經勝處供遊賞誰摘路  
上銘 地僻當衝輿荒涼海一灣豈知奇絕處  
即在渺茫間從此添名勝衰年亟往還尚留餘  
興在落帽更龍山

勅建海神廟 在海寧春熙門內海塘通志雍正七年九

月奉

上諭

恭紀  
首卷

勅建總督李衛奏請委原任布政使張迺知府

蔣杲王坦監修擇海寧縣治之東購買民地四十

畝啟建正殿五楹崇奉

勅封寧民顯祐浙海之神以唐誠應武肅王錢鏐吳英衛

公伍員配享左右配殿各三楹以越上大夫文種

漢忠烈公霍光晉橫山公周凱唐潮王石瑰昇平

將軍胡暹宋宣靈王周雄平浪侯捲簾使大將軍  
曹春護國宏佑公朱彛廣陵侯陸圭靜安公張夏  
轉運判官黃恕元平浪侯晏戩仔護國佑民永固  
土地彭文驥烏守忠明寧江伯湯紹恩茶槽土地  
陳旭從祀周迴夾道脩廊中為甬道前為儀門三  
楹大門三楹左鐘樓右鼓樓門臨河承以石梁曰  
慶成橋橋南歌舞樓三楹繚以粉垣闢左右為廣  
衢表以二石坊後殿為重門進內正中恭建

御碑亭敬勒

聖製海神廟碑文後為寢殿上構岑樓東西配殿由正殿  
之東啟門而入為天后宮前為齋宿廳後為道院  
正殿之西為風神殿後有池有亭池上為平橋三  
折而度內為高軒為重門後為水仙閣規度崇宏  
氣象軒翥始於雍正八年三月明年十有一月訖  
工十一年正月

欽頒

御書福寧昭泰四字一幅製額恭懸正殿二月

遣內大臣海望直隸總督李衛告祭乾隆四年六月

欽頒

御書清晏昭靈四字匾額恭懸正殿西湖志纂乾隆二

十七年三月初二日

皇上閱視海塘

御製

海神廟瞻禮有作七言律詩一首

恭紀  
首卷

御題正殿之額曰澄瀾保障

御書殿柱一聯曰百谷歸墟澤滙江湖資利濟三疊循

軌潮平龕楮慶安恬

御製閱海塘記

恭紀首卷

恭勒廟中

勅建觀音廟 在小尖山之巔

世宗憲皇帝廑念浙江海塘為瀕海諸郡保障以大士慈悲為心救度為緣普濟衆生禦災捍患因即尖山之麓建大士廟以棲神靈答景貺經始於雍正十



二年冬十月乾隆元年八月告成二年

皇上御製碑文

恭紀  
首卷

恭勒貞珉以昭禮敬二十七年三

月初二日

皇上閱視海塘

駕幸尖山之廟中

御製尖山禮大士作七言截句一首

恭紀  
首卷

御題殿額曰補陀應現殿柱對一聯曰耳觀海潮音非

彼非此心源甘露品大慈大悲

勅建海神廟 在省城南江干地本名觀潮樓亦稱大

觀樓奉懸

聖祖仁皇帝御題恬波利濟四字額其地直對海門當潮

汐往來之衝為浙右之大觀乾隆二十二年

皇上再舉省方之典

閱視海塘三月二十八日禮部奉

上諭

恭紀首卷

以浙海之神自雍正八年海塘告成時

特加褒勅於海寧地方建廟崇祀邇年海波不揚安瀾疊

慶實咨神佑

勅于杭州省城之觀潮樓敬建海神廟以昭答祐經部  
臣議准以浙江海神恬安城社保衛田廬比年以  
來順軌安瀾民物殷阜謹遵

諭旨咨令浙江督撫即於觀潮樓度地繪圖請帑興建  
於二十二年六月二十七日開工至八月初八日  
告成

皇上御賜海神封號曰平潮利涉浙海之神

金史卷之二十一  
卷十一  
賜祭文一道并令春秋二祭

御題正殿之額曰保障東南

御書聯句云神佑安瀾曲折三江潮有信人沾利澤澄

清萬里海無波二十三年三月

御製浙海神廟碑文

恭紀  
首卷

恭勒貞珉以昭崇祀二十五

年六月巡撫莊有恭以江海沙漲奏聞

皇上以佳兆命虔往觀潮樓海神祠致祭撫臣于七月

初一日遵

旨詣廟虔祀

勅建英衛公廟

在吳山宋名忠清廟亦稱中興觀俗稱

伍廟祀吳行人伍員史記吳王夫差入越勾踐棲  
會稽之上請和子胥諫不聽賜屬鏤之劍取子胥  
尸浮之江中吳人憐之為立祠江上命曰胥山咸  
淳臨安志唐元和十年刺史盧元輔修並作胥山  
銘景福二年封廣惠侯宋雍熙二年四月詔重建  
廟大中祥符五年海潮大溢衝激杭城詔每歲春

秋醮祭賜忠清廟額封英烈九年馬亮知杭州禱  
於祠下明日潮殺又出橫沙數里隄岸乃成康定  
九年守蔣堂重建嘉祐七年太守沈邁修政和六  
年加封威顯紹興三十年加封忠壯乾道五年周  
安撫淙重修嘉定十七年累封為忠武英烈威德  
顯聖王紹定四年賜緡錢重建嘉熙三年趙安撫  
與憲又易而新之廟舊有星宿閣至是閣成撫英  
衛二字以名理宗親灑宸翰以賜焉寶祐間顏安

撫顧仲移英衛閣于正殿後咸淳五年安撫潛說  
友修治其封爵自嘉熙至咸淳累改為忠武英烈  
顯聖安福王成化杭州府志元封為順佑忠孝威  
惠顯聖王洪武四年奉旨封定神祇稱吳行人伍  
公之神祭日每歲用九月二十日祭以豕一府長  
官主之西湖遊覽志正統十四年重修萬厯二年  
巡撫萬安蕭公重修前殿沈友為記錢塘縣志崇  
正十六年重修西湖志雍正三年以神為浙省保

障之神

勅封英衛公奉

旨重修祠宇兩廡附祀掌潮神祇每歲春秋二祭西湖志

纂乾隆十六年

御題匾額云靈依素練

文

宋真宗吳山廟春秋建道場詔 杭州吳山廟

神實主洪濤聿書往冊頃者湍流暴作閭井為



憂致禱之初厥應如響禦災捍患神實能之用  
竭精衷有如常祀庶憑誠感永庇吾民宜令本  
州每歲春秋建道場三晝夜罷日設醮其青詞  
學士院前一月降付

盧元輔胥山祠銘 元和十年冬十月朝散大  
夫使持節杭州諸軍事杭州刺史上柱國盧元  
輔視事三歲塵天子書上畏羣靈下慚蒸人乃  
啓忠祠叙而銘曰維唐敷視典於天下廢淫置

明資父事君罔有不舉寢廟既設我命厥新有  
周行人伍公字子胥陪吳之職得死直言國人  
求忠者之屍禱水星之舍將瞰鵠革遂臨浙江  
千五百年廟貌不改漢史遷曰胥山今曰青山  
者謬也吁善父為孝記曰父讎不與共戴天諫  
君為忠經曰諸侯有諍臣不失國當阮於宋鄭  
絕楚出疆在平為末宦臣在奢為既壯子坎壤  
仗節乞師於吳軍鼓丁寧五戰至郢鞭墓走昭

非逆施也夫差既王宰嚭受賂二十年内越祀  
又顛泰伯廟血將乾闔閭劍光先失公朝焉宴  
焉入則諫焉孰謂矢毒孰謂刀寒雖言屢出口  
而車甲已困於齊矣蟹稻已奪於歲屬鏤之賜  
竟及其身鷗夷盛屍投于水濱憤懣鼓怒配濤  
作神迄今一日再至來也海鷗羣飛陽侯夾從  
聲遠而近聲近而遠奮於吳怫於越夕於楚乃  
退於是仲秋闕望杭人以旗鼓逐之笳簫和之

百城聚觀大耀威靈卷沙墨裂地灰截若岸圻  
成坑迎潮氏格之如呂梁丈人為靈戈威矛激  
浪百重堵塞不先跳檣揭艖再飯之間絕其音  
聲蕩潏千里洪波砥平有滑有腴有鹽有腥遙  
實乎下庭山海梯航雞林扶桑交臂於茆階金  
狄在戶雷鼓在堂魏樽漢豆六代笙簧可謂奉  
天爵之馨香獲神人之盛禮佐皇震怒驅叱大  
邪萬里永清人觀斗氣銘曰武王鉞紂子胥鞭

平為人為父十死一生矯矯伍員執弓挾矢杖  
其寶劍以謁吳子稽首楚罪皆中紂理蒸報子  
妻殲鉏直士赫赫王閭實聽竒謨錫之金鼓以  
號以誅黃旗大舉右廣皆朱戳墓非赭瞻昭乃  
烏後王嗣立執書不泣顛越言潤宰嚭讒輯步  
光欲飛姑蘇待執吾則切諫扶眼不入投於河  
上自統波濤晝夜兩至懷沙類騷洗滌南北鯀  
蕩東西蠻夷卉服罔敢不來雖非命祀不讓瀆

濟帝帝王王代代明明表我忠哉

王安石重建忠清廟記 予觀子胥出死亡遁竄之中以客寄之身卒以說吳折不測之楚仇報恥雪名震天下豈不壯哉及其危疑之際自能慷慨不顧萬死畢諫於所事此其志與夫自恕以偷一時之利者異也孔子論古之士大夫若管夷吾臧武仲之屬苟志於善而有補於當世者咸不廢也然則子胥之義又曷可少耶康

定二年予過所謂胥山者周行廟庭嘆吳亡千  
有餘年事之興壞廢革者不可勝數獨子胥之  
祠不徒不絕何其盛也豈獨神之事吳之所以  
興蓋亦子胥之節有以動後世而遺愛尤在吳  
也後九年樂安蔣君為杭使其州人力而新之  
臨川王安石與之銘曰烈烈子胥發節窮逋遂  
為策臣奮不圖軀諫合謀行隆隆之吳厥發不  
遂邑都俄墟以智死昏忠則有餘胥山之巔殿

屋渠渠千載之祠如祠之初孰作新之民歡而趨惟忠肆懷惟孝肆孚我銘祠庭示後不誣

王安國忠清廟記 胥山廟者吳人奉祀已千

百餘年至于今天子命祀而使之歲時祈祝未嘗懈也嘉熙七年長興沈公作藩於杭政以大成下畏以愛既而雨暘或愆躬禱於廟歲仍大熟於是邦人以為神之賜也乃相與告於公曰願治廟堂以妥神靈公既樂詔教之施能媚于



民而又嘉民之不忘神惠而思為報也故聽之  
八年六月廟成公遂祭享耆稚嗟嘆咸願刻石  
以詩題之而使人來請詞於臨川王安國乃作  
詞曰維此勾吳太伯肇居其後綿綿享有邑都  
闔閭夫差力欲圖伯有臣子胥才實剛者報楚  
入郢遂棲越君使國為雄我志獲伸彼何宰嚭  
冒貨奸宄我憤於忠國亦旋毀武林之墟胥山  
之岡立廟以祀民思不忘既歷年久報事不懈

以迄于今帝遣祈拜公作邦伯實治廟民每祀  
必誠獲應於神卒是逾歲風雨順節謂非神休  
有或留藥人乃告公廟堂將傾願易而新不戒  
遽成嚴嚴之堂有翼其廡憑依之威觀者俯僂  
衆曰迄事公即大祭賓贊肅虔簫鼓喧沸豕羊  
具肥桂酒香醇神願享之醉飽欣欣衆願具石  
刻載厥美繫之銘詩庸告無止

趙與權英衛閣記 英衛者始建吳山忠清廟

閣名今上親灑宸翰以賜者也初山有星宿閣  
直廟之前堪輿家指為龍首紹定辛卯年毀其  
後廟雖新而閣不復嘉熙乙亥六月與權被命  
再尹京時失水故道湍激波蕩無虛日沙若坍  
而陷岸若墜而頽曩時潮所不及地遇大汎彌  
望七十里間潰為洪流月塘真如古剎亦宛  
在水中沍僉謂此天災難以人力勝因就付以  
築隄事固辭弗俞用欽承休命程土石計徒傭

具畚鍤興工役凡人力所至不敢不勉且乞靈  
於神以相之有請于朝得旨新作臺門仍建傑  
閣棟梁峇崑丹青輝煥爰肖神像巍然中居侍  
衛旁立冠佩陸離羣山四環大江前繞川祗波  
后罔不帖妥聽命閣甫就而水陸寺前之壩亦  
不日而成脫蛟龍垂涎之淵為軍民奠枕之地  
匪人之謀皆神賜也既有撫英衛二字以名之  
又奏乞奎畫以賁之於是新閣偉然冠山椒而

特立鎮江濤而不驚顧前之為閭者大有逕庭  
矣私竊自念神之威靈在天其行事在史其愛  
在民其功在後世奚以記為然有司職在推廣  
皇仁答揚神貺之意其可以無述乃為之言曰  
天地正大剛烈之氣鍾而為神其生也家則為  
孝子國則為忠臣其歿也上則為星辰下則職  
江海所謂越宇宙而挺生亘古今而長存者神  
蓋其人也神不忍宰詬信越之浮詞誘於伐齊

之利而忘其玩吳於股掌之上也遂以懇懇之忠極諫於王而不諱屬鏤之賜甘心如飴其為言曰自我死後世必以我為忠上配夏商之臣與龍逢比干為友遂伏劍而死每讀吳越春秋至此未嘗不感憤而涕泗也嗚呼士大夫出身事主患不明國之安危與主之榮辱爾知之明則竭力而為盡忠以告視死生禍福與鴻毛等逮其以言觸咎身膏鈇鉞而其眷眷念國猶不

忍替亦以忠義之心知國重於身爾充此志也  
雖云千百世之下其英靈衛國凜凜猶生若神  
者所謂鍾天地正大剛烈之氣者非耶按史記  
吳人憐之為立祠江上則神之祀於吳蓋有年  
於茲其英風義氣與江濤俱壯其全名巨節與  
吳山俱高至其加愛吳人則千載猶一日越漢  
厯唐以至我朝廟祀之典有崇罔墜自六飛駐  
蹕錢塘以江為重江之神以忠清廟為重故祀

猶加嚴而缺典尚多先是神之父國號以楚兄以鄭故老口相傳莫之經見而母嫂妃猶未賜嘉號遂具疏以聞下奉常褒封追爵父奢烈侯以母嘉應夫人配兄尚昭順侯以嫂淑惠夫人配悉像於廟之東房總曰王府之殿尊尊也妃曰協清夫人新命也大中祥符間著為令每歲春由翰林院撰詞命羽流祈福率即殿歲醮事殊不稱典爰即故門址改剏醮殿表曰延真且



俾天明宮道士葉揆宸領廟之管鑰而灑掃之  
國家崇奉廟祀之典至是告備閣經始於是年  
之七月落成於十有一月殿及延真相繼竣役  
則歲庚子四月也皆廟鉅事宜牽連特書凡役  
工三萬五千有奇為屋六十有七楹

蘇軾祭英烈王文 欽誦舊史仰瞻高風報楚  
為孝徇吳為忠忠孝之至實與天通開塞陰陽  
幹旋濤江保障斯民以食此邦嗟我蠢愚所向

奇窮豈以其誠有請輒從庚子之濤海若伏降  
完我岸閘千夫奏功牲酒薄陋報微施豐敬陳  
頌詩侑此一鍾

虞集奉旨撰祭伍子胥文 爾以忠隕主潮於  
吳潮今為灾吳其沼乎爾其揚靈具訓海若俾  
安其常毋作民虐既止既安民遂有生爾作神  
明永有令名

徐一夔歲祀伍公廟祝文 惟神昔在於吳以

忠而殞廟食茲山用昭素憤神氣不磨護潮出  
沒白馬素車尚見彷彿唯聖御宇有嘉其忠申  
勅守吏歲祀是崇潔茲牲醪荐於神所庶其來  
歆永奠江潯

傅敏重修英衛公廟碑記 英衛公廟祠春秋

吳行人伍公也公歿吳人祠諸江上號胥山廟  
唐封廣衛侯錢武肅王奏改惠應旋晉吳安王  
宋賜祠額忠清改封忠壯侯又建英衛閣以祀

元季疊晉八字王封釐明祀典詔郡長吏歲以九月二十日記而祠額不改

國家祇膺寶命百神率職薄海際天颺紆濤謚雍正紀元之元年

勅封英衛公

詔發帑銀以新公祠於是知杭州府事臣魏定國知仁和縣事胡作柄知錢塘縣事臣楊夢琰祇承祠部牒擢選材鳩工肇工於八月之十有六日歲

事於十一月十有七日堂寢門廡形碧絢耀而役不逮坊里抗人士聚觀親額謂宜有以宣

上德述神貺臣傳敏時署巡撫事爰紀其源流暨歲月鏡諸麗牲之碑謹案公懋勲偉績春秋左氏傳史記蓋綦詳矣獨歿而歸神大海依潮來徃其說始見於越絕書吳越春秋而越絕謂於大江中或疑當屬揚子又越絕北至秀之語兒吳山地本隸越而不知章沅番禺胥號大江而是時

吳適棲越今棠邑姑蘇諸地雖雅多公蹟胥山  
要以抗為準至其神之揚靈潮汐也如武肅王  
禱於祠而沙漲十餘里宋馬亮禱而潮却且出  
橫沙數里趙與懽肅禱而江干七十八里之決  
以塞英威煇赫綽有可紀

天子軫念浙東西耆庶敬舉秩祀崇號上公而祠部檄  
守臣新猷腐剝泐之棟墉以安公靈視前代禮  
有加焉宜矣昔漢有防海大塘唐史載鹽官塘

浙江惟富陽塘錢塘長隄差可考然白居易任  
刺史業慮濤激西北而大厯八年宋祥符景佑  
慶厯元豐淳熙紹熙元致和暨明洪武後五大  
潰決毀陷漂敗不可勝紀唯

國家修舉水政警愾霰冒其於捍江捍海實克舉  
端木氏趙氏暨范陽鄺氏之所錄王克虞喜盧  
肇燕肅余靖張載蘇軾史伯璿金履祥之所覃  
思而極論華信李濬李蟠後諸賢之所昨塗夕

燎而僅獲集事者胥薈萃其經畫以見諸石因  
木櫃絡竹排椿間而祇荐罔獲矯誣水害迄用  
是息然則山陽之材鴻鷺之羽百鍊之族有所  
不能抑鐵輪鐵絙以貫鐵幢有所不能鎮而稽  
望秩於虞書繹懷柔於周頌此其克符祭法禦灾  
捍患之旨而神職以共民生以乂者也且抗郡  
東南形勝遙控海江當桐江入境東觀定浮錯  
對裏山漁浦諸峯峙青點黛及其出龕楮厯沙



潭會錢清上虞兩江而東也近則石墩白塔遠  
則花鳥陳錢以迄於葉壁疊島斜鳥盤臺之外  
且不啻億萬里而鯨颶鯉霧訖偕鹽官潮胥帖  
粹然則於越之西陵衝波可以無庸擊航之西  
津恬流可以無庸渡而靈戈威矛恒偃戢於浪  
山濤屋之中俾杭郡百萬戶廬舍塍隴無虞震  
騰者惟公衛於斯滋固而

聖天子之德海涵天復而莫之有涯也臣敏等備位列

嶽爰敢附唐宋守土臣後肅撰廟銘焉其辭曰  
艾陵退息城山進攻凡為臣者孰如公忠昭關  
東奔紀南西趙凡為子者孰如公孝維忠維孝  
千人之英歿而歸海海若震驚一日再來素車  
白馬火霆錯擊銀潢倒瀉揚波重水異壤同神  
忠孝協軌以衛斯民

帝德覃敷爰被二浙濤清噴玉隄堅屹鐵乃報公功崇  
封肇開薨參星斗楹餘雷雲醺酒刳牲雅歌節

舞潮平山碧樂此終古

詩

梁簡文伍子胥廟 去國資孝本循忠全令名  
舟裏多奇計蘆中復吐誠偃月交吳艦魚麗入  
楚營元功惟妙算千載藉餘聲濤洪猶鼓怒靈  
廟尚淒清行潦承椒奠按歌雜鳳笙無勞晉人  
壁詎用楚臣纓密樹臨寒水疎林望遠城  
野霧入衣帳積苔生惟有三清鳥斂翅時逢迎

羅隱青山廟 市簫聲咽跡崎嶇雪恥酬恩此  
丈夫霸主兩忘時亦異不知魂魄更歸無

釋常雅伍相廟 蒼蒼古廟映林巒漠漠烟霞  
覆古壇精魄不知何處在威風猶入浙江寒

徐凝題伍胥廟 千載空祠雲海頭夫差王國  
已千秋浙波只有靈濤在拜奠青山人不休

王禹偁胥山忠清廟 朝驅下越阪夕飯當吳  
門停車訪古跡靄靄林烟昏青山海上來勢若

游龍奔星臨斗牛域氣與東南吞九折排怒濤  
壯哉天地根落日見海色長風捲浮雲山椒載  
遺祠興廢今猶存殘春弔木客倒樹哀清猿我  
來久沈抱重此英烈魂吁嗟屬鏤鋒宜爾國士  
冤我我姑蘇臺榛荆曉露繁深居麋鹿游此事  
誰能論因此毛髮墜落葉秋紛紛

曹既明胥山廟 間關欲雪父兄讐底用平生  
錫蓋侯冤骨未沉吳越曉征魂初返楚雲秋西

施正倚承恩貌范蠡將移去國舟尚向松陵親  
卻敵藁砧依舊在層樓

方行子胥廟觀潮 吳越中分兩岸開怒濤干  
古響奔雷子胥不作忠臣死勾踐終非伯主才  
歲月消磨人已老江山壯麗我重來鷗夷鐵箭  
今安在目極洪波萬里回

高啓伍公廟 地老天荒伯業空曾於青史見  
遺公鞭屍楚墓生前孝抉眼吳門死後忠魂壓

怒濤翻白浪  
劍埋冤氣血  
腥風我來無限傷心  
事盡在胥山烟雨中

徐渭伍公祠  
吳山東畔伍公祠  
野史評多無  
定時舉族何時同  
刈草後人却苦論  
鞭屍退耕  
始覺投吳早  
雪恨終嫌入郢遲  
事到此公真不  
幸屬鏤依舊語  
夫差

沈九如伍公廟  
伍相祠堂春晝長  
屬鏤拜賜  
念先王風清鬼馬吹沙磧  
日落神龍鬬石梁江

上陰雲浮劍履夜歸星斗撲衣裳夫差水殿還  
歌舞十二鳴箏下鳳凰

勅封靜安公廟 舊名昭貺廟在候潮門外渾水閘東江

塘上咸淳臨安志故司封郎官張夏祠也夏雍邱

人景祐中為兩浙漕使江潮為患故隄率用薪土

潮水衝擊每繕修不過三載輒壞重勞民力夏始

作石隄延袤十餘里

四朝聞見錄作石隄一十二里

人感其功慶

厯二年立祠隄上嘉祐六年

四朝聞見錄作十年

褒賜太常



少卿政和二年封寧江侯後改安濟公賜昭貺廟  
額紹興十二年後累封靈濟顯佑威烈安順王淳  
佑八年重建廟夢梁錄左右奉十潮神嘉靖浙江  
通志成化間工部侍郎李顥來治潮患禱神而應  
即舊址重建浙江通志

國朝雍正三年

勅封靜安公春秋致祭

詩

王安石張工部廟使節紛紛下禁中幾人曾  
到此城東獨君遺像今如在廟食真湏德與功

臣謹案張司封祠自昭貺廟外又有東安濟  
廟在馬婆巷俗名祖廟又名太平院

勅封天后廟 宋順濟聖妃廟也在艮山門外咸淳臨安

志神本莆田林氏女數著靈異祠於莆田之聖堆  
宣和中賜順濟額艮山有祠自商份感夢始開禧  
寶慶一再創建夢梁錄海洋之中佑護船舶其功

甚大民之疾苦悉賴憐蒙 大清一統志神世居  
莆田湄洲嶼宋都巡檢林愿第六女雍熙四年昇  
化是後嘗衣朱衣飛翻海上里人祠之宋元明時  
累著靈蹟加封號

本朝康熙十九年

封護國庇民妙靈昭應宏仁普濟天妃

遣官致祭二十二年克澎湖恍有神兵引導及屯兵天妃  
澳靖海侯施琅謁廟見神衣半濕始悟實邀神助

時澳駐師萬餘忽湧甘泉琅上其異

勅建神祠於湄洲勒文以紀功德隨又

加封天后五十九年奉

旨春秋致祭編入祀典雍正四年

御賜神昭海表之額十一年

賜錫福安瀾額令有江海各省一體葺祠致祭

文

宋寧宗加封助順勅 古以女神列祀典者若

湘水之二妃北阪之陳寶西宮之少女南嶽之  
夫人以至丁婦滕姑亦皆廟食夫生不出於閨  
門而死乃祠于百世此其義烈有過人者矣靈  
惠妃宅於西湖福此閩粵雨暘稍愆靡所不應  
朕惟望舒耀魄其名月妃川祗靜波其名江妃  
爾之封爵既曰妃矣增錫嘉號被之淪渙崇大  
褒顯凡以為民尚休異恩以永厥祀

丁伯桂艮山順濟聖妃廟記 神莆陽湄洲林

氏女少能言人禍福歿廟祠之號通玄神女或  
曰龍女也莆臨海有堆元佑丙寅夜現光氣環  
堆之人一夕同夢曰我湄洲神女也宜館我於  
是有祠曰聖堆宣和壬寅給事路公允迪載書  
使高麗中流震風入舟沉溺獨公所乘神降於  
檣遂獲安濟明年奏於朝賜廟額曰順濟紹興  
丙子以郊典封靈惠夫人逾年江口又有祠祠  
立二年海寇憑陵效靈空中風掄而去州上其

事加封昭應其年白湖童邵一夕夢神指為祠  
處丞相陳公俊卿乃以地券奉神立祠於是白  
湖又有祠時疫神降曰去湖丈許脉有甘泉我  
為郡民續命於天飲斯泉者立痊掘泥坎甘泉  
涌出至者絡繹朝飲夕愈甃為井號聖泉即以聞  
加封崇福越十有九載福興都巡檢使姜特立  
捕寇遙禱響應上其事加封善利淳熙甲辰民留  
葛侯郭禱之丁未旱朱侯端學禱之紹熙庚戌

夏旱趙侯彥勵禱之隨禱隨答具狀聞於兩朝  
易爵以妃號惠靈慶元四年加助順之號嘉定  
元年加顯衛十年加英烈神之祠不獨盛於莆  
閩慶江浙淮甸皆祠也艮山之祠舊傳監丞商  
公份尉崇德日感夢而建

詩

劉克莊三月二十一日泛舟 雖沉璧馬計安  
施倏忽桑田變渺瀰說與神通君看取潮頭不



到艮山祠

臣謹案天后顯靈江湖閩省尤著而廟之在  
杭州者惟艮山祠為最古其外武林門城東  
北隅亦有天后宮

國朝雍正九年總督李衛毀西洋天主堂改建  
廟貌隆煥獨冠郡城

海塘錄卷十一